

Акафист **преподобному Кириллу Белоезерскому**

Память празднуем 22 (9) июня

Кондак 1

Избранный от Царя сил Господа Иисуса, воине духовный и чудотворче предивный, преподобне Отче наш Кирилле, восхваляем Тя любовью в песнех духовных, святаго заступника нашего, ты же, яко имеяй благосердие многое, преклонися милостивне к нам воспевающим тя, и предстательством твоим ко Господу, от всяких бед свободи зовущих ти радостно:

Радуйся, Кирилле, великий Чудотворче!

Икос 1

Ангел земный и человек небесный воистинну был еси, Отче преподобне, от утра жизни твоя до глубокаго вечера смертнаго, неленостно работавый Господеви в преподобии и святыни, нам же оставивый в пример подражания житие твое равноангельное, емуже чудящися, и чудеса твоими просвещаеми зовем Ти гласы хвалебными сице:

Радуйся, родителей благочестивых плод боголюбезный; радуйся, первопрестольного града Москвы прозябение святое. Радуйся, сиротствовавый в юности твоя; радуйся, в сиротстве твоём Бога любовью усердною взыскавый. Радуйся, в сыновство Божие свыше сопричтенный; радуйся, вся богатства мира сего Христа ради презревый. Радуйся, радости и утехи земные ни во что же вменивый. Радуйся, едино тщание имевый, еже единому Богу благоугождати. Радуйся, чтением писаний божественных душу твою напитавый; радуйся, слезами молитвенными сердце твое у плодоносивый. Радуйся, чистоту душевную и

телесную непорочно сохранивый; радуйся, постом и воздержанием страсти юношеские обуздавый.

Радуйся, Кирилле, великий Чудотворче!

Кондак 2

Видев сродник твой, именитый болярин Самодержца Российскаго, благодравие души твоея, Отче преблаженне, возлюби ты и постави строителем дома своего, да печешися о потребах его, ты же молвами житейскими обуреваемый, зело болезновал еси душею твоею и тепле молился еси ко Господу, да сподобит тя вне мира и его сует, в безмолвии Ему служитьи и невозбранно воспевати ангельскую песнь: Аллилуия.

Икос 2

Разумом богопросвещенным позна благоплодие души твоея преподобный Стефан, игумен обители, иже на Махре, егда прииде во град Москву и познася с тобою, святче Божий, емуже ты со слезами желание сердца твоего исповедал еси, яко хочещи инок быти, и от него обручение ангельскаго образа восприял еси. Поминая убо таковую ревность твою к подвигом духовным, ублажаем тя, яко избранника Божия, и умиленно глаголем:

Радуйся, кроткий и незлобивый последователю Христов; радуйся, заповеди Евангельские самым делом совершивый. Радуйся, самоотвержение дивное по глаголу Господа твоего явивый; радуйся, знатность рода и почести мирские, Христа ради оставивый. Радуйся, вместо риз златотканых, рубища иноческая возлюбивый; радуйся, крест Христов со усердием на рамо твое восприявый. Радуйся, в души твоей добродетели высокия насадивый; радуйся, всякое пристрастие суетное в себе искоренивый. Радуйся,

противу мира, плоти и диавола крепко вооруживыйся; радуйся, силою Божиею победивый вся их прилоги. Радуйся, бывый сосуд непорочен Божия благодати; радуйся, соделавыйся страшен и неприступен врагом невидимым.

Радуйся, Кирилле, великий Чудотворче!

Кондак 3

Силою Божией укрепленный, не убоялся еси, преподобне, гневавшагося на тя сродника твоего, иночествовати тебе возбранявшаго, но от руки священнаго Феодора, архимандрита Симонова монастыря, совершенное пострижение во ангельский образ восприял еси, и в стенах обители его тихое пристанище спасения себе обрел еси, труды к трудом прилагая, и в молитвах деннонощных сладце воспевая спасителю Богу: Аллилуия.

Икос 3

Имея послушание от настоятеля, еже трудитися в хлебне и поварне, Отче досточудне, не дал еси сна очима твоима, ни веждом дремания, но неленостно трудился еси, днем дрова секий, огонь возжигаяй, хлебы и пищу братии приготавливаяй, нощию же в молитвах, псалмопениих и коленопреклонениих бодренно пребываяй, был еси добрый делатель Царствия Небеснаго, по степенем добродетелей восходивый к совершенству духовному. Темже восхваляем тя сице:

Радуйся, иноче Богоугодный, иночествовавый нелицемерно от искренния души; радуйся, послушниче совершенный, слово веления самим делом предварявый. Радуйся, слезный искателю блаженства вечнаго; радуйся, молитвенный воздеятелю рук

преподобных горе ко Господу. Радуйся, огнем пещным в хлебне и поварне, огонь мучения вечнаго себе напоминавый; радуйся, послушанием поваренным умиления глубину стяжавый. Радуйся, хлеб той слезами любви ко Господу орошавый; радуйся, питье твое плачем покаянным растворявый. Радуйся, прежде всех обретаемый в храме на службах Божественных; радуйся, возлюбивый приметатися к дому Бога твоего. Радуйся, поста суровством умертвивый плоть твою, да не возобладает она духом; радуйся, чрез два и три дня пищу скудную вкушавый.

Радуйся, Кирилле, великий Чудотворче!

Кондак 4

Буря страстей и тяжелоносныя искушений волны, аще и приразишася к тебе в новоначалии иноческом, угодниче Божий, обаче не возмогоша поколебати крепость произволения твоего, еже единому благоугождати Богу. Темже молитвою, постом и послушанием истинным вся стрелы вражия, на тя испущенныя, недейственны сотворил еси и сподобился еси еще во плоти, в безстрастии глубоцем, возносити Творцу Серафимскую песнь: Аллилуия.

Икос 4

Слышав о добродетельном житии твоем, великий Сергей Радонежский, возлюби тя зело, отче Кирилле. И егда приходяше от пустыни своя в обитель Симонову, прежде всех посещаше тя, суца в подвигах иноческаго послушания, предпочитая тя юнаго старцем многолетним, и тем во удивление приводя всю братию, от егоже уст святых много словес душеполезных слышал еси, и слагая их в сердце твоем, был еси добрый ученик великаго учителя, воистину

достойный благохвалений таковых;

Радуйся, Богоносного Сергия избранный друже и собеседниче; радуйся, любовь велию о Господе к нему стяжавый, и от него зело возлюбленный. Радуйся, во смирении твоём высокая дарования духовная получивый; радуйся, уничиженно трудивыйся в подвигах послушания и тако Сергиева посещения сподобленный. Радуйся, при послушаниях твоих никогдаже возроптавый; радуйся, суд Божий и муки вечныя приснопамятовавый. Радуйся, почестей суетных и славы человеческия избегавый; радуйся, юродство Христа ради на ся восприявый от всех уничижен будеши. Радуйся, от настоятеля наказуемый, безчестие в почесть себе вменивый; радуйся, худыя и многошвенныя ризы носивый. Радуйся, зимним хладом тело твое угнетаый; радуйся, покой телесный возненавидевый.

Радуйся, Кирилле, великий Чудотворче!

Кондак 5

Боготечное светило быв, на свещнице священства поставился еси волею настоятеля твоего, отче Кирилле, и яко непорочный олтаря Господня служитель, со страхом и благоговением жертву безкровную приносил еси Богу, иже содела тя тайнозрителем многих великих чудес, в таинстве евхаристии сокрытых и являемых священнослужителем достойным, к нимже и ты сопричтен был еси, зовый от любве теплыя пострадавшему за нас Христу: Аллилуия.

Икос 5

Видевше тя братия в обители Симоновския, богоносна и равноангельна житием, Кирилле богоблаженне, избраша тя, аще и нехотяща, во

Архимандрита обители своея, ты же жезл настоятельский прием, не превознеслся еси толикаго сана высотой, но сугубо во смирении преуспевал еси и был еси образ преподобия словесному твоему стаду, словом и житием поучая твоя ученики, иже и взываху к тебе:

Радуйся, боговещанный учителю благочестия и чистоты; радуйся, умиления преисполненный проповедниче покаяния. Радуйся, егоже словеса быша во спасение многим; радуйся, егоже увещания умягчиша окаменелая во гресех сердца. Радуйся, не словом токмо, но и всем житием, поучавый духовная твоя чада; радуйся, чесому учил еси, та и сам творил еси неленостно. Радуйся, князей богомудрый советниче; радуйся, сильных мира сего нелицеприятный обличителю. Радуйся, нищих и убогих любвеобильный кормителю; радуйся, егоже любовь к меньшим о Христе братьям никогдаже оскуде. Радуйся, егоже благодеяниями насладишася мнози; радуйся, в немже прославляшеся на земли Отец Небесный.

Радуйся, Кирилле, великий Чудотворче!

Кондак 6

Проповедник смирения истиннаго явился еси, Отче, егда, стужив си славою и молвою настоятельства в Симонове, оставил еси настоятельство и удалился еси в безмолвие келейное, да един Единому Богу возможеши работати невозбранно, обаче и в безмолвии не остави ты враг спасения человеческого, вооружив на ты наставшаго по тебе настоятеля, егоже гневу место уступая, преселился еси на старое Симонове, и тамо уединенно пребывая, немолчно воспевал еси песнь

Богу: Аллилуия.

Икос 6

Возсия тебе свет небесный, егда в вечер глубокий молился еси, преподобне, в келии твоей пред иконою Богоматери, прося Ю даровати тебе место удобное к безмолвному житию, и се абие услышал еси глас от иконы Ея святыя, сице глаголющ: «Кирилле, изыди отсюда и иди на Белоезеро: тамо бо уготовах ти место, на немже возможеша спастися», и с гласом вкупе, луча светозарная от полунощныя страны осия и указа место, свыше предъизбранное для твоего вселения, егоже радостно созерцал еси оконцем твоея келии. Тебе убо сице обрадованному, и мы радостно восклицаем:

Радуйся, великий угодниче Божий, еще на земли созерцавый свет небесный; радуйся, избранный слуго Матери Господни, возглаволавшей к тебе от иконы Своея святыя. Радуйся, благоволением Владычицы мира облагодатствованный; радуйся, прошения твоего исполнения от Нея приемый. Радуйся, яко молитва твоя услышана бысть Заступницею рода христианскаго; радуйся, яко ночь просветися тебе сиянием Божественныя славы. Радуйся, яко далече отстоящее место, близъ показася тебе судьбами Божиими дивными; радуйся, яко свыше даровася тебе место покоя духовнаго. Радуйся, радости и утешения о сем преисполненный; радуйся, слезы теплыя благодарения и хваления пред Богом изливавый. Радуйся, молитв благовонное кадило; радуйся, псалмопения органе изящный.

Радуйся, Кирилле, великий Чудотворче!

Кондак 7

Дивное видение и глас от иконы Богоматере бывший,

поведал еси, преподобне отче, спостнику твоему и другу, преподобному Ферапонту, и с ним вкупе оставил еси град отечествия твоего, и потекл еси в пустыню непроходимую на Белоезеро, ища Богом указанного ти места, еже обрет, зело возрадовался еси, и на нем в пещере вселился еси, во освящение же месту, честный Крест, своима рукама соорудив, тамо поставил еси, зовый распеншемуся на кресте и поправшему силу адову, Царю славы Христу: Аллилуия.

Икос 7

Новым подвигом духовным вдал еси себе, богоблаженне отче, в пустыни уединенно пребывая в молитвах, пощениих и трудех непрестанных, иже видя Всевидец Господь, собра к тебе паству иноков пустыннолюбивых, иже хотяху жити с тобою, и назидатися от тебе во спасение: и тако устроил еси обитель святую, яко крин в пустыни процветшую духовно, в нейже до днесь прославляется имя твое сими достодолжными похвалы:

Радуйся, преподобне, святостию и чистотою светло украшенный; радуйся, богоносне, дарами Божественными свыше одаренный. Радуйся, пастырю добрый тобою собраннаго стада словесных овец; радуйся, строителю богомудрый общежития иноческаго. Радуйся, пустыню непроходимую в вертоград духовный трудами твоими претворивый; радуйся, вся страхования и привидения вражия молитвами твоими посрамивый. Радуйся, несомненною надеждою на Бога обитель твою созидавый; радуйся, слезами молитвенными основание ея оросивый. Радуйся, нищий духом, но многи богатящий; радуйся, рукою Всевышняго державно охраняемый. Радуйся, от

напрасныя смерти дивно избавленный; радуйся, от запаления огненнаго невидимо защищенный.

Радуйся, Кирилле, великий Чудотворче!

Кондак 8

Странное видение бысть разбойником, обитель твою ограбити умыслившим, святче Божий, иже пришедше к ней нощю, видеша ратных людей множество, на страже вокруг обители стоящих, и ограбити ю непопускающих, егдаже уведеша, яко некоторые стражи не бысть во обители тоя нощи, познаша Божию ты защищающую силу, и с раскаянием притекше к тебе, исповедаху видение чудесное, о немже радуяся, воспел еси со ученики твоими, спасающему ты Богу, благодарственную песнь: Аллилуия.

Икос 8

Весь в Боге быв, упование крепкое на Бога возложил еси, отче преподобне, яко силен есть препитати ты со ученики твоими, в пустынном месте пребывающими. Темже подаяния просити ни к комуже посылал еси, веруя несомненно, яко вся к житию потребная от руки Божия получиши: и по вере твоей и молитве, от боголюбцев вся сия и без прошения твоего получал еси, удивляя чада твоя силою веры творящие чудеса, и подвизая звати тебе:

Радуйся, безмолвия рачителю, молву суетную возненавидевый; радуйся, богомыслия высоту, попечении житейскими недосыгаемая. Радуйся, воздержания в пици и питии правило известное; радуйся, нетрезвеннаго пития во обители твоей имети возбранивый. Радуйся, законоположения святых Отец неизменно сохранивый; радуйся, к подвигом высоким ученики твоя руководивый. Радуйся, достигни в меру

совершенства о Христе; радуйся, приявший власть на духи нечистая. Радуйся, чудотворения даром обогащенный; радуйся, силою божественною преисполненный. Радуйся, прозорливость благодатную проявивый; радуйся, помощь целебную немздоприимно подававый.

Радуйся, Кирилле, великий Чудотворче!

Кондак 9

Вси иноцы обители твоея, преподобне отче, яко Ангела Божия тя почитаху, ибо воистинну ангелоподобнии нравы являл еси им в житии твоём святом, иже все бысть посвящено богоугождению непрестанному. Темже дивныя чудеса творити дарова тебе Бог: недужныя исцелял еси, бесноватая от мучения диавольскаго свобождал еси, будущая прорицал еси, еще же и самих мертвецов воскрешал еси молитвою твоею, во еже пети о тебе ближним и дальним, хвалебную песнь верховному чудес Творцу Богу: Аллилуия.

Икос 9

Витийство человеческое не может изрещи величие чудес твоих, угодниче Божий, отче Кирилле, имиже житие твое земное, яко цветами благовонными, духовно благоукрасися, облагоухая души верных сладостию преподобия и святыни, и приводя их к славословию Бога, сице прославльшаго тя своего избранника, нам же внушающаго взывати к тебе:

Радуйся, болящих добрый целебниче; радуйся, разслабленных благосердый укрепителю. Радуйся, слепым зрение многожды даровавый. Радуйся, бесноватых от насилия диавольскаго освободивый. Радуйся, болярина Романа от одра смертнаго здрава

возставивый; радуйся, умершаго инока Далмата на покаяние воскресивый. Радуйся, оскудевшее во обители твоей вино для Литургии святыя чудесно умноживый; радуйся, во время глада опустевшую житницу хлебом наполнивый. Радуйся, оным хлебом гладныя люди милостивно препитавый; радуйся, яко хлеб той, тобою раздаваемый, в житнице не оскудеваше, но паче умножашеся.

Радуйся, Кирилле, великий Чудотворче!

Кондак 10

Спасение вечное унаследовал еси, угодниче Божий, и кончину праведную, яко венец подвигом твоим, получил еси, неболезненно и мирно прешед от земных к обителям небесным, идеже святая твоя душа, воздаяние прия от руки Вседержителя Бога, и со Ангельскими воинствы предстоит престолу Его Божественному, воспевая немолчную Ему песнь: Аллилуия.

Икос 10

Царя Небеснаго рабе благий и верный, данный тебе талант не сокрывый, но трудолюбно его усугубивый, и многу куплю духовную им сотворивый, отче Кирилле, помози и нам, земным и перстным, подражати житию твоему святому, и стяжати при исходе нашем благу надежду спасения, да поем тебе умиленными гласы:

Радуйся, святче Божий, свято и непорочно скончавый жизнь земную; радуйся, избранниче Христов, неболезненно и мирно предавый дух твой в руке Божии. Радуйся, яко смерть твоя честна пред Господем, и успение со Святыми; радуйся, яко память твоя с похвалами почитается во Святей Церкви. Радуйся, яко преселився в небесныя обители, и земных

не оставляеши; радуйся, яко от горних высот
благосердием твоим к земнородным проникаеши.
Радуйся, чудотворец бывый при жизни, таковым же
явивыйся и по смерти; радуйся, обитель твою и по
скончании твоём сохранивый. Радуйся, чада твоя
духовная и по смерти твоей не забывый. Радуйся, во
утешение им целебныя мощи твоя оставивый. Радуйся,
чтущим тя скорый предстателю. Радуйся, усердный
всех прибегающих к тебе заступниче.

Радуйся, Кирилле, великий Чудотворче!

Кондак 11

Пение молебное приносится верными у раки святых
мощей твоих, Кирилле богоносне, иже аще и в недрах
земных почивают, обаче лучи многих чудес испускают,
озаряя души и сердца ищущих с верою твоего
заступления, егоже сподоби и нас, смиренных, сия
песенныя хвалы тебе возносящих, и Богу благодарно
зовущих: Аллилуия.

Икос 11

Светозарный светильник Божия благодати, озаряя
полунощную страну Российскаго Царства, явился еси,
преподобне и досточудне отче Кирилле, духовным
сиянием твоих подвигов и чудес просветивый пустыню,
и в ней обитель иноком устроивый, идеже постников
лики тихое пристанище спасения обретают, и тя,
первоначальника своего, любовь величающе,
песенно тебе вопиют:

Радуйся, великоименитый и многославный в чудесах
подвижниче; радуйся, ангелонравный человекче.
Радуйся, отечества твоего благодатное утешение;
радуйся, обители твоя присное радование. Радуйся,
мощами твоими преславно в ней чудодействуя;

радуйся, молитвы и прошения наша во благо исполняй. Радуйся, смирение при жизни и по смерти возлюбивый; радуйся, смиренно мощам твоим в недрах земных почивати восхотевый. Радуйся, яко рака твоя честная врачебница явися недугом человеческим; радуйся, яко от нея всяк с верою приходяй дары целебныя приемлет. Радуйся, реко чудес приснотекущая; радуйся, источниче исцелений никогдаже оскудевающий.

Радуйся, Кирилле, великий Чудотворче!

Кондак 12

Благодати Божия светлое жилище быв при жизни, угодниче Божий, и по смерти твоей благодати причастну соделал еси раку мощей твоих, чудесы преславными уверяя нас, яко велик еси пред Господем, и яко много может молитва твоя пред благостию Его. Яви убо и нам, недостойным, щедроты твоя молитвенныя, и предстательством твоим теплым окорми нас ко пристанищу спасения, да поем на земли живых, присно живыми и мертвыми обладающему Владыце Богу: Аллилуия.

Икос 12

Поюще многая и преславная чудеса твоя, преподобне отче Кирилле, смиренно просим тя, небеснаго заступника нашего: в час грозный смертный, егда убогая душа наша к исходу своему приблизится, покажи нам многомощное твое заступление, и избави нас предстательством твоим от власти сил темных, обыкших преграждати душе человечесей восход в горния обители, ихже достигнути сподоби нас молитвами твоими, да зовем тебе благодарными гласы:

Радуйся, пресвятой единосущные Троицы усердный

служителю; радуйся, Пресвятая Владычицы Богородицы достойный избранниче. Радуйся, Ангельских сил светлый собеседниче; радуйся, Предтечи Господня пустыннолюбивый подражателю. Радуйся, Пророков Божиих прозорливый подобниче; радуйся, Апостолов Христовых единоправный последователю. Радуйся, мучеником добропобедным сравнившийся в подвизех терпением. Радуйся, святителем богомудрым соревновавший душеспасительным учением. Радуйся, сияющая звездо в лице преподобных; радуйся, блаженный сожителю праведных и всех святых. Радуйся, о немже радуются и Бога хвалят человецы; радуйся, егоже трепещут темные адския силы.

Радуйся, Кирилле, великий Чудотворче!

Кондак 13

О, великий угодниче Божий и Чудотворче, преподобне Отче Кирилле! Ты горе на небеси, мы долу на земли, удаленнии от тебе не толико местом, колико грехами нашими: обаче дерзаем приносити тебе сие малое похвальное пение, еже милостивно приемши, умоли милосердаго Творца, помиловати нас и избавити геенны огненныя и мучений адских, да сподобимся вкупе с тобою, в Царствии Небеснем, пети Ему вечно радостную песнь: Аллилуия.

(Этот кондак читается трижды, затем икос 1 и кондак 1)

Икос 1

Ангел земный и человек небесный воистинну был еси, Отче преподобне, от утра жизни твоя до глубокаго вечера смертнаго, неленостно работаый Господеви в преподобии и святыни, нам же оставивый в пример подражания житие твое равноангельное,

ему же чудящиеся, и чудеса твоими просвещаемы зовем
Те гласы хвалебными сице:

Радуйся, родителей благочестивых плод
боголюбезный; радуйся, первопрестольного града
Москвы прозябение святое. Радуйся, сиротствовавший в
юности твоя; радуйся, в сиротстве твоём Бога любовью
усердною взыскавший. Радуйся, в сыновство Божие
свыше сопричтенный; радуйся, вся богатства мира сего
Христа ради презревший. Радуйся, радости и утехи
земные ни во что же вменивший. Радуйся, едино
тщание имевый, еже единому Богу благоугождати.
Радуйся, чтением писаний божественных душу твою
напитававший; радуйся, слезами молитвенными сердце
твое у плодоносивый. Радуйся, чистоту душевную и
телесную непорочно сохранивший; радуйся, постом и
воздержанием страсти юношеские обуздавший.

Радуйся, Кирилле, великий Чудотворче!

Кондак 1

Избранный от Царя сил Господа Иисуса, воине
духовный и чудотворче предивный, преподобне Отче
наш Кирилле, восхваляем Тя любовью в песнях
духовных, святаго заступника нашего, ты же, яко
имеяй благосердие многое, преклонися милостивне к
нам воспевающим тя, и предстательством твоим ко
Господу, от всяких бед свободи зовущих ти радостно:

Радуйся, Кирилле, великий Чудотворче!

Молитва

О, священная главо, преподобне и Богоносне Отче
Кирилле! Припадаем к тебе с верою и любовью, и
просим тя, небеснаго заступника нашего: яви велие
милосердие твое нам, смиренным и грешным, и пролей
теплые молитвы твои о нас ко Господу Богу.

Свойственно есть тебе благосердие, святче Божий, ибо живущу ти на земли, едино бысть у тебе попечение, еже спасати от погибели греховны души человеческии, и вся твоя жизнь святая бысть зеркалом добрых дел, о нихже прославляшеся в тебе Отец Небесный, к Немуже велие дерзновение стяжав, испроси нам у благости Его: веру праву, благочестие нелицемерное, покаяние истинное, братолюбие совершенное и преуспеяние во всех благих делах. Исходатайствуй нам здравие душевное и телесное, земли плодоносие, воздуха благорастворение, мирное и безмятежное житие, непостыдную христианскую кончину и добрый ответ на страшнем Суде Христовом. Сохрани Церковь Святую и Державу Российскую от браней и нестроений. Огради обитель твою честную от всякаго зла, и вся правоверныя люди, к тебе приходящия и мощем твоим покланяющияся, осени небесным твоим благословением, и вся прошения их во благо исполни. Ей, Отче, не презри молитв наших, со умилением тебе возносимых, но буди о нас теплый предстатель ко Господу, и сподоби нас помощью твоею святою спасение вечное получитьи, и Царствие Небесное унаследовати, да славословим великия щедроты и неизреченныя милости Отца и Сына и Святаго Духа, в Троице покланяемаго Бога, и твое отеческое заступление, во веки веков, аминь.